

ՀԱՂՈՐԴՈՒՄՆԵՐ

Վ. Հարությունյան

ՄԻ ՀԱՅԱՏԱՌԻ ՄԱԿԱԳՐՈՒԹՅԱՆ ՄԱՍԻՆ

1954 թ. ապրիլին մեկնելով Կիև՝ մասնակցելու համար Ուկրաինական ՍՍՌ ճարտարապետության ակադեմիայի հորելյանական սեսիայի աշխատանքներին, առիթ ունեցա ծանոթանալու Կիևի ճարտարապետական հուշարձաններին, որոնցով այնքան հարուստ է քաղաքը:

Ռուսական ճարտարապետության հնագույն հուշարձան՝ Կիևի Սոֆիայի տաճարը (1037), որն այն օրերին հիմնովին նորոգվում էր, առանձնապես գրավեց իմ ուշադրությունը տարածական իր հարուստ ձևերով և ներքին պատերին եղած բազմաթիվ որմնանկարներով:

Հյուսիս-արևելյան խորաններից մեկում, որը սուրբ Վլադիմիրի անունն է կրում, գտնվում է իր չափերով բավականաչափ մեծ մարմարե մի սարկոֆագ, որի բոլոր կողմերը և երկթեք խուփը ամբողջովին պատած են զարդաքանդակներով: Սարկոֆագը համարվում է Յարոսլավ իմաստունի գերեզմանաքարը և զարդաքանդակների ոճական առանձնահատկությունների շնորհիվ՝ կարող է վերագրվել ռուսական արվեստի վաղ շրջանին 11—12-րդ դդ.:

Իմ ուշադրությունը գրավեցին սարկոֆագի խուփի հյուսիսային երեսին առանձին-առանձին փորագրված հայկական 4 տառերը, որոնցից առաջին երկուսը իրենց նկարով բավականաչափ հին ձևեր ունեն և կարող են վերաբերվել 11—12 դարերին:

Բնչ առիթով են արված այս մակագրությունները, արդյոք դրանք թողել են սարկոֆագը նկարադարդող հայ վարպետները, թե տաճար եկած հայ ուխտավորները. դժվար է ասել, սակայն անտարակույս այդ մակագրություններն ուշագրավ են և արժանի հատուկ ուսումնասիրության, որպես հայ-ռուսական հարաբերությունների վաղագույն փաստաթղթերից մեկը:

Ներկա հաղորդման նպատակն է մեր պատմաբանների և հայկական գրի մասնագետների ուշադրությունը հրավիրել վերոհիշյալ մակագրությունների վրա, դրանք ավելի հանգամանորեն ուսումնասիրելու համար: Ստորև բերվում են այդ տառերի գծանկարները:

Ա Գ Ն Պ